

**AAQQIISUT**

Aalajangiussassatut siunnersuut 27. februar 2012-imik ullulerneqartoq taarserpaa, siunnersuutip aalajangiussassatut siunnersuutitit oqaasertalersornissaata kinguneranik teknikkikkut iluarsineqarpoq.

Inatsisartut malittarisassaanni § 33, imm. 4 naapertorlugu aalajangiussassatut siunnersuut tullittooq saqummiunneqarpoq.

**Kalaallit Nunaanni sullivinni avatangiisit pillugit inatsisip allangortinneqarnissaa pillugu inatsimmut oqaaseqaatissaq pillugu Inatsisartut aalajangiussassaattut siunnersuut**

(Inuussutissarsiornermut Aatsitassanullu Naalakkersuisoq)

**Tungavigisaq**

Sulisitsisup inatsimmi piunasaqaataasut eqqortippagit, sulisitsisup pinerluttulerinermi inatsit naapertorlugu akisussaaffianik killiliinissaq inatsisissatut siunnersuutip imaraa. Tamatuma saniatigut sulisut piaaralutik imaluunniit sakkortuumik mianersuaalliornikkut sullivimmi avatangiisit pillugit inatsit unioqqutippassuk, peqatigisaanillu sulisitsisup inatsimmi malittarisassat eqqortippagit, sulisut pinerluttulerinermi inatsit naapertorlugu pineqaatissinneqarnerat sakkortusineqassapput.

Taamatuttaaq siunnersuutigineqarpoq sulinermi avatangiisit pillugit inatsimmik unioqqutitsineq perlasinermik kinguneqarsimatillugu, inuup ajoquserujussuarneranik imaluunniit toquneranik nassataqartumik, pinerluttulerinermi inatsisitigut pineqaatissiisarneq Danmarkimisulli sukateriffigineqassasoq.

Pinerluttulerinermi inatsisitigut akisussaaneq pillugu allannguutissatut siunnersuutigineqartut danskit sulinermi avatangiisit pillugit inatsisaanni allannguutaasimasut tungavigalugit paasineqassapput, tak. inatsit nr. 300, 19. april 2006-imeersoq aamma inatsit nr. 1395, 27. December 2008-meersoq.

Taamatuttaaq siunnersuutigineqarpoq sanaartornerup iluani ataqatigiissaarisunut sulisilluni avatangiisinut tungasunik immikkut ilinniartitaaneq Danmarkimisulli atulersinneqassasoq.

Tamatuma saniatigut sulisilluni avatangiisit pillugit Kalaallit Nunaanni ilinniartitsinermut Sullivinnik Nakkutilliisoqarfiup aningaasartuutaanik matussutissat ilaannik akileeqqusisarnisamat inatsimmik erseqqissumik Sullivinnik Nakkutilliisoqarfiup tungavissinnissaa siunnersuutigineqarpoq.

Kiisalu kingunerisassat tungaasigut allannguuteqarnissaq siunnersuutigineqarpoq, sulinermi avatangiisitigut suliassaqrifiup ilaata, sinerissap avataani sulinermut tungasup, Namminer-sorlutik Oqartussanit tiguneqareernerata malitsigisaanik, tak. suliassaqrifiup aatsitassanut tungasup aammalu sulinermi avatangiisit pillugit suliassaqrifiup ilaa, Kalaallit Nunaata

imartaani nunallu toqqaviani immap naqqaniittumi sinerissap avataani uuliasiorfeqarnermut tunngasup Namminersorlutik Oqartussanit tiguneqarnissaa pillugu Inatsisartut aalajangiiffi-gisassaattut

Naalakkersuisut siunnersuutaat Inatsisartut ulloq 23. oktober 2009-mi tapersersugaat.

### **Inatsisissatut siunnersuut tulliuuttunik immikkoortoqarpoq:**

- Sulisitsisup inatsimmi malittarisassat eqqortissimappagit, sulisitsisup pinerluttulerinermi inatsit naapertorlugu akisussaaffiisa killilerneqarnerat. Aammattaaq sulisut piaaralutik imaluunniit sakkortuumik mianersuaalliorlutik sullivimmi avatangiisit pillugit inatsimmik unioqqutitsippata, sulisup pinerluttulerinermi inatsit naapertorlugu pineqaatissinneqarnera sakkortusineqassaaq.
- Sullivimmi avatangiisit pillugit inatsimmik unioqqutitsinerit ajutoornermik inuup annertuumik ajoquserneqarneranik toquneranilluunniit kinguneqartut pillugit pinerluttulerinermi inatsit naapertorlugu pineqaatissiinerit sakkortusinerat.
- Isumannaallisaanermik peqqissutsimillu sulineri ataqatigiissaarisunut sullivimmi avatangiisit pillugit ilinniartitaanissamut tunngavissaqalerneq.
- Kalaallit Nunaanni sullivinni avatangiisit pillugit inatsit maannamut avataasiorluni sulineri tunngasuupput, avataani sulliviit (qilleriviit) ilanngullugit. Kalaallit Nunaanni Namminersorlutik Oqartussat 1. januar 2010-mi atuutilersumik avataani sulineq eqqarsaatigalugu sullivimmi avatangiisit akisussaaffigilerpaat. Kalaallit Nunaanni aatsitassat ikummatissallu pillugit inatsisartut inatsisaanni erseqqissagaavoq, tassani aalajangiussassatut siunnersuut akuersissugineqartoq ilanngunneqarluni. Tamanna naapertorlugu Kalaallit Nunaanni sullivinni avatangiisit pillugit inatsimmi avataasiorluni sulinerup ilaatinneqannginnerata erseqqissaatigineqarnissaa siunnersuutigineqarpoq.
- Sulisoqarnermut ministerip akiliutit pillugit malittarisassanik aalajangersaasinnaaneranut tunngavissineq, Sullivinnik Nakkutilliisut sullivinni avatangiisit pillugit ilinniartitaanerup ingerlanneranut aningaasartuutaasa ilaasa akilernerannut sulisitsisumut akiligassiinerit taakkualu akiliutaat. Sullivinni avatangiisit pillugit ilinniartitaaneq pilersinneqarmalli, sullivinni avatangiisit pillugit suleqatigiit ilaasortai ilinniartitaanermut inatsisit naapertorlugit pisussaaffiusumut peqataagaangata, sulisitsisut akiliutaat akiligassiissutigineqartarput. Sullivinnik Nakkutilliisut akiligassiisarnernannut siusinnerusukkut paatsuugassaangitsumik erseqqissumillu tunngavissaqartoqarsimanngilaq. Taamaasiornikkut maanna suleriaasiusoq ataatsimoortumik inatsisitigut tunngavissinneqarpoq.

### **Pisortanut aqutsinikkut aningaasatigullu kinguneri**

Sullivinni avatangiisit pillugit ilinniartitaanermut Sullivinnik Nakkutilliisoqarfiup aningaasartuutaanut sulisitsisut akiliutaasa maannamutut annertussuseqartuaannarnissaat siunertaavoq. Sullivinnik Nakkutilliisoqarfiup akiliutinik akiligassiisinaanera pillugu allannguutissatut siunnersuut taamaallaat maanna aaqqissuussinerup inatsisigut tunngavissinneqaatigaa, taamaasillunilu allannguut taanna pisortanut aningaasatigut kinguneqassanngilaq.

Tamatuma saniatigut siunnersuut pisortanut allaffissornikkut aningaasatigullu taasariaqartunik kinguneqartussaanninnera naatsorsuutaavoq.

Suliani sullivinni avatangiisinut tunngasuni pinerluttulerinermi inatsit naapertorlugu pineqaatissiissutinut allannguutissatut siunnersuutit, politiinut aamma unnerluussisutut

oqartussaasunut atugassarititaasut annertunngitsut nalinginik kinguneqartussaassagunarpoq. Inatsisissatut siunnersuutip kingunerisaanik politiit aamma unnerluussisutut oqartussaasut aningaasartuutiginerusinnaasaat, akuersissutinut sinaakkusiussat maanna piusut iluini akilerneqassapput.

**Inuussutissarsiortunut allaffissornikkut aningaasatigullu kinguneri**

Sullivinni avatangiisit pillugit ilinniartitaanermut Sullivinnik Nakkutilliisoqarfiup aningaasartuutaanut Sullivinnik Nakkutilliisoqarfiup akiliutinik akiligassiisinaanera pillugu erseqqissumik tunngavissiiinissamik siunnersuut maanna aaqqissuussinerup inatsisitigut tunngavissinneranut taamaallaat tunngasuummat, allannguneq inuussutissarsiortunut aningaasatigut kinguneqassanngilaq.

Sanaartormik suliaqarfiusumi ataqatigiissaarisunut immikkut ittumik ilinniartitaanermik ingerlataqarnissap pisussaaffiunissaanik siunnersuutip sullivinni avatangiisit pillugit ilinniartitaaneq nalinginnaasoq assigisaanik sivisussuseqartoq taarsissavaa, taammaatumillu aningaasartuuteqarnerulernermik kinguneqarnissaa naatsorsuutigineqarani.

Siunnersuutip inuussutissarsiortunut taasariaqartunik allaffissornikkut kinguneqarnissaa naatsorsuutigineqanngilaq.

Sullivinni avatangiisit pillugit inatsisip allanngortinneqarnerata Kalaallit Nunaanni atuuttussanngortinneranik Inatsisartut aalajangiissasut Naalakkersuisut kaammattuutigaat.